

浙江文叢

輿地紀勝

〔第十冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

輿地紀勝

〔第十冊〕

卷第一百五十三至一百七十六

〔宋〕王象之 編著 趙一生 點校

輿地紀勝卷第一百五十三

潼川府路

瀘州 江陽 瀘川 瀘南

州沿革

瀘州，上。瀘川郡。《九域志》。瀘川軍節度。《國朝會要》云：唐下都督府。皇朝乾德元年，爲上州。宣和元年，陞節度。《禹貢》：梁州之域。《元和郡縣志》。天文東井、輿鬼之分野。此據《圖經》引《漢書志》。又《晉志》以爲觜、參之分野。《唐志》以爲東井、輿鬼、鶉首。不同。春秋戰國爲巴子國，秦屬巴郡。《寰宇記》。漢武帝分置犍爲郡，而犍爲郡之江陽、符縣，即今之州域是也。《元和郡縣志》。東漢末，劉璋立江陽爲郡，以都尉廣漢成存爲太守。《華陽國志》：在建安十八年。《輿地廣記》：蜀章武元年，立江陽郡。《寰宇記》云：『晉於此立江陽郡。』不同。又《晉志》：江陽郡統縣三，曰江陽、符、漢安。注云：『蜀置郡。』而《宋志》云：『江陽郡，劉璋分犍爲立。』則當作建安十八年。蓋建安十九年，趙雲

已定江陽，非劉璋所統，則劉璋置郡當在十八年。當從《華陽國志》及《宋志》。蜀先主人益州，諸葛亮分遣趙雲從外水定江陽、犍爲。《通鑑》：在建安十九年。晉穆帝時，桓溫舟師伐李勢，軍次江陽。《元和郡縣志》。後爲夷獠所沒。《元和郡縣志》。寄治武陽。《宋志》江陽郡下。《宋志》：東江陽太守，何志云：晉安帝初，流寓入蜀，今新復舊土爲郡。領縣二，曰漢安，曰綿水。穆帝又置東江陽郡。《元和郡縣志》云：治瀘川。宋、齊因之。此據《寰宇記》。而《齊志》有江陽郡，領江陽、常安、漢安、綿水四縣。又有東江陽郡所領，亦略同。梁置瀘州，《元和郡縣志》云：『梁大通初，割江陽郡置瀘川郡，魏置瀘州。』而《隋志》及《寰宇記》、《輿地廣記》皆云：梁置瀘州。李臺《西山堂記》云：『梁大同中，徙治馬湖。隋大業中，復還於今地。』取瀘川以爲名，仍移治馬湖江口。《圖經》。隋廢州，爲瀘川郡。大業二年。還治于此。唐復爲瀘州。武德元年。置瀘州都督府，督十〔四〕〔二〕州。曰溱、珍二州，曰晏、納、奉、浙、鞏、陰六州，曰順州，曰思峨州，曰涪州，曰能州，並屬瀘州都督府。事見《寰宇記》。又范百祿《平夷記》曰：『唐自儀鳳以來，闢硐招獠，列置郡邑，而隸瀘州都督府者十有四州、五十四縣。』與《寰宇記》不同。改瀘川郡。天寶元年。復爲瀘州。乾元元年。五代王氏，《通鑑》云：乾寧四年，王建將王宗〔既〕〔阮〕〔三〕拔瀘州。孟氏《通鑑》長興二年，孟知祥將張武取瀘州。繼有其地。皇朝平蜀，地歸版圖。乾德三年。陞爲上州，《國朝會要》：在乾德三年。乞弟犯順，夔梓路兵馬鈐轄始移司於瀘，又兼瀘南沿邊安撫，專治軍政。《圖經》：在熙寧中。又《眉州志》載：神宗時乞弟蠻叛，經制韓存寶逗遛不進。詔斬存寶于瀘州，以林廣代之。廣討乞弟，至歸徠州。受乞弟降以歸。自是始兼沿邊安撫，專治軍政，部使者不得輒與。見人物門任師中傳。又《通

略》：神宗元豐五年間，詔徙夔梓路（軫）〔鈐〕^{〔三〕}轄司於瀘州，仍兼沿邊安撫使。陞爲節度，賜名瀘川軍。《國朝會要》云：宣和元年，詔瀘州西南要地，控制一路邊閫之寄，付畀非輕，可陞爲節度，仍賜名瀘川軍。宣和二年，詔瀘州守臣帶潼川府、夔州路兵馬都鈐轄瀘南沿邊安撫使。御筆帶梓夔路兵馬都鈐轄瀘南安撫使，去『沿邊』字，《皇朝郡縣志》：在政和五年。尋仍舊以沿邊安撫使入銜。政和七年。中興以來，四路各建帥府，分委邊防。而夔路鈐轄，猶兼於瀘南。張魏公浚宣撫川防，奏請各專其任，而夔、梓始分，乃各陞本路安撫，惟瀘州止帶沿邊安撫，統隸不過三州。其後王之奇以檢詳建言，乞以瀘南爲潼川府路安撫使，俾得刺舉一道。自是權任益重。乾道六年。瀘州爲一路安撫，自梁介始。乾道六年，梁介以四川宣撫司參議官改知瀘州。居歲餘，民夷便之。詔改瀘南，兼安撫一路，以旌其能，瀘州爲一路安撫，自梁介始。事見《成都志》。今領縣三，治瀘川。《九域志》云：元領縣五。乾德五年，省綿水縣爲鎮，入江安。以富義縣隸富順監。

縣沿革

瀘川縣，中。

倚郭。本漢江陽縣地，屬犍爲郡。東漢末，爲江陽郡。晉太康二年，移郡治於支江、汶江合流之際，以縣爲治。穆帝於此置東江陽郡，領江陽縣。《隋志》：『舊曰江陽，并置江陽郡。開皇初，郡廢。大業初，置瀘川郡，

縣改名焉。』《舊唐書志》云：『梁置瀘州，故以江陽爲瀘川縣，州所治也。』本朝乾德五年，併涇南縣入焉。

江安縣，中。

在州西南一百一十五里。《元和郡縣志》云：『本漢江陽縣地。』漢末，爲江陽郡。《晉中興書》云：『穆帝永和二年，漢安獠反，攻郡縣。』《舊唐志》云：『晉時，生獠攻郡，破之。又置漢安縣於此。』《隋志》云：『舊曰漢安。開皇十八年改爲江安縣，屬江陽郡。』《圖經》云：『唐屬瀘州。舊縣城在汶江中洲，水數爲害，遷於南岸。』《唐志》云：『貞觀元年以夷獠（尹）〔户〕^{〔四〕}置思隸、思逢、施陽三縣，尋俱省入江安。』《國朝會要》云：『乾德五年，省綿水縣入焉。』

合江縣，中。

在州東一百二十三里。本《西漢志》符縣地。《輿地廣記》云：『漢武帝使唐蒙將萬人從巴符關入夜郎即此。』《東漢志》曰：『符縣屬犍爲郡。』《晉志》曰：『符屬江陽郡。』《元和志》云：『晉穆帝於此置安樂縣。』《宋志》、《南齊志》並有安樂縣。《元和郡縣志》又云：『梁改曰安樂戍。周保定四年，廢戍，置安樂縣。隋開皇十八年，改縣曰合江，以江在縣側合流爲名。』《隋志》以改合江在後周。當從《隋志》。唐元和十二年，移治舊縣，以便水陸貿遷之宜。從東川節度使李逢吉之請也，皇朝移治安樂故城。

樂共縣

《通略》：神宗元豐十六年，林廣記云：自入夷界，築樂共、江門、大州、鎮溪、梅嶺五城砦，降生夷三萬人，西達涓井，東通納溪，控制要害，盡入封略。今有路，分一員節制戍兵，控扼蠻人。

風俗形勝

東接巴郡，南接牂柯，西接犍爲，北接廣漢。《華陽國志》。江陽之俗，樸野少儒學。《華陽國志》。先有王延世著勳河平，後有董鈞爲漢定禮。《華陽國志》江陽郡下。西連犍道，東接巴渝，南望夜郎牂柯。《鎮遠樓記》。瀘爲州，肘江負山。自西南來，如人聳臂轉掌，覆布五爪。劉正字《城西李氏園序》。氣候偏陽，夏秋多炎燠，冬無苦寒。勾公權《瀘川縣解記》。又云：『每夏秋蒸溽，公餘偃仰，如傍（楫）「挹」大爐（韠）「韠」^{〔五〕}。』瀘，古巴子國，淙流東北貫其隅，墮山西南蟠其城。任伋《開福寺記》。地無桑麻，每歲畚田，刀耕火種。《寰宇記》。郡得名爲瀘，李臺《西山堂記》曰：『郡得名爲瀘者，蓋始因梁大同中，嘗徙治馬湖江口，置瀘州。蓋馬湖即瀘水下流，當時於此立州，因遠取瀘水以爲名。』取瀘水以爲名。《寰宇記》。五月渡瀘，諸葛武侯南征，使李恢自建寧，馬忠自牂柯，而身自出越嶲，五月渡瀘。世未有原其說者。方吳蜀之分，五溪諸夷遙接益州四郡，雖不能爲害，然有事之際，得之即強。故先主伐吳，使馬良招五溪諸蠻授以官爵，五溪之南，即益州牂柯郡界。及先主敗於秭歸，益州四郡皆叛應吳，高定恣睢於越嶲，雍

闔跋扈於建寧，朱褒反叛於梓柯，闔又受吳之爵，執蜀刺史張裔以與吳，安然不忌。此非獨以險遠爲心，蓋益州四郡，上可撼巴峽以爲奇，下可通湘、廣以備敗。自漢以來，益州四郡，皆士大夫主之，非獨蠻夷而已。公之南伐，蓋以杜塞四郡歸吳之心，使四郡根據於吳，遙結五溪諸夷，則巴峽非漢有也。傳所謂因其酋豪擒縱孟獲，使之不叛者，特公之餘略耳。事見《敘州圖經》。李嘉謀《武侯祠堂記》、《容齋隨筆》云：『國朝淳化中，李順亂蜀，招安使雷有終遣嘉州士人辛怡顯使於南詔，至姚州，其節度使趙公美以書來迎，云：『當境有瀘水，昔武侯戒曰非征討貢獻，不得輒渡此水。若必欲濟，須致祭然後登舟。』今遣本部將賁金龍二條、金錢三十文，併設酒脯，請先祭享而後渡。事見辛怡顯所作《雲南錄》。』

象之又按：《唐書志》姚州雲南郡下，有瀘南縣，則瀘水當在姚州。與辛怡顯《雲南錄》相合。土地雖迫，山川特美，有鹽井、魚池，一郡豐沃。《華陽國志》漢安縣下。據江洛會，枕帶雙流。《輿地廣記》。瀘控西南諸夷，遠逮爨蠻，最爲邊隅重地。元豐以來，置守率用武臣，其後始更置儒守。政和六年，孫義叟《修城記》。又云：自政和乙亥始，更置儒守。瀘自元豐間，始建沿邊帥府。乾道六禩，升領劍東一道十五州，權任益重。李稟《西山堂記》。熙豐以後，地望加重，梓夔路兼都鈐轄置司在焉。視成都之兼利益路，每相抗衡。乾道間，詔總潼川路帥。《鎮遠樓記》。江安，隋舊邑也，號爲舟車往來之衝。其外，即與西南夷接。《照菴記》。又云：自唐閣羅鳳之帥出入於此。而國朝元豐以來，問罪之師，亦由此啓行。蜀偏西南地，勢處坤炎，劉拓開與夷爲門。玉斧一畫，軫畦乃分聖矣。夫真人出，而爲吾蜀慮也。史子震《鎮遠樓賦》。最近蠻獠，尤宜撫綏。《通略》：太祖開寶八年，上召新瀘州錢文敏，見於講武殿，謂之曰瀘州最近蠻獠，尤宜撫綏。

景物上

瀘江 按《郡國志》：瀘江中，有大闕焉。季春三月，則黃龍堆沒闕，即平黃龍堆者，即尹吉甫子伯奇自投江處。詳見黃龍堆下。

天池 在江安縣西十二里方山上。四圍皆十餘丈，旱澇水無盈縮，旱則禱焉。

汶水 出岷山，順流而下，東南過犍爲數縣境。又曰：汶江，蘇代所謂蜀地之甲浮船于汶，乘夏水而下者也。《圖經》云：『東流入合江縣界。』

方山 距州城三十五里。《舊志》載：唐天寶，改爲回峰山。其山八面，望之面面相朝，於群山中最。山根傍江，江上有魏武帝廟。《華陽國志》云：『方山之下，有方山神。』又《圖經·祠廟門》云：『去瀘川縣八十里。』不同。然江安神亦有方山，上有天池，下有神祠，恐《圖經》指江安縣之方山也。皇朝討乞弟陰雨踰月，神宗皇帝封香禱焉，有應，遂賜廟號。

海觀 在州治南定樓之右，即城東隅兩江合流處。舊爲來風亭，丞相趙公敞而大之，易今名。夏潦高漲，兩江環合，瀾漫浩渺，真海觀也。閻侍郎《蒼舒詩》云：『雲南之陰大江東，二水犇騰如海衝。誰能具此壯觀眼，南定樓中今卧龍。』

綿水 《舊經》云：自長寧軍流至江安一百五十步，與汶江合。江安古有綿水縣，今爲綿水鄉，當時縣去綿水必近也。《水經》謂綿水出梓潼縣資中，至江陽入江，即內江也。與此不同，姑兩存之。

涇灘 在江安縣南三十里灘上。有山刺天，瀑布飛下，側有卧石，父老傳爲武侯誓蠻之地。

東巖

在汶江之東。紹興中，邦人開創大像，依巖不足以庇風雨。近歲有庖者祁氏親死廬墓，棄俗奉香火於巖，邦人信之，不十年重樓複閣，佛宮經藏，甲於一境。

西巖

在汶江西。

南巖

在南山之隈。

北巖

在州治水北，與南定樓相對。舊止小菴，尚書楊公汝明鼎新創爲大刹。又於寺北作北園，建北定樓及五峰書院，以爲士友會課之所，月書季考若郡學焉。

南樓

巽巖李燾建。是爲瀘川軍許奕書額。

錦堂

在州治。舊爲正寢室，後遷寢所于「□」〔六〕。袁繡王大過刻其家藏御書于堂之左右壁。

寶山

在州城。初名堡子山，爲巡檢廨陳公損之移廨山西，建堂其上，袁公說友名其堂曰『江山平遠易，堡子爲寶山。』皆大書揭之。下瞰城郭，萬瓦鱗集，兩江合流，諸山拱揖，真勝絕也。又有西山堂，相傳寶山

即古之盧〔七〕，李真《西山堂記》以辨其非是。下有木龍巖，黃庭堅所名也。

雁塔

在郡學。趙衛公即講堂中庭，植雁塔二，以鑱進士姓名。

龍祠

在城崇德廟，瞰大江，下有潭，上有龍祠。歲旱，則州遣吏沈石匣金龍于潭，輒應。

三泉

在寶山之西。鼎峙嵌岩間，王大過鑿山濬泉，榜曰『西山三泉』。

雙井

在州治中，又郡城西偏有甘井。紹興中，斥壕塹得碑，乃唐乾元中蘇德充所開也。

鹽井

南井鹽歲計四十一萬斤，陀魯井歲計二萬八千斤。

石門 《九域志》云：有二立石，狀若門。

石櫃 在合江縣安樂川之趾，乃劉真人藏經之處。

石船 在合江縣登天廟溉水下，每歲水落，隱隱見于廟溉。

照菴 在江安縣三里。山石奇秀，草木茂異，而庵居其間，四山環之，而闕其北。十二清流，鏘然有聲，若中金石。有卧雲菴、靈源堂、鳴琴室、鍾秀軒、修禊亭、襲淵橋，皆燕息遊觀之所也。

内江 一名支江。《舊經》云：支江水在城外。北自富順監界鴛鴦溪流下，徑安夷鎮，至州北一百六十里入汶江，其色赤。今與江合流處，有涇渭之判焉。酈道元所謂綿水西出綿竹縣，東經資中，即此水也。

〔傳〕〔傳〕園 在安夷門外，去城二里。傅氏闢以爲遊觀之所。

重園 出城南十里，重氏之居在焉。乃觀堂劉公讀書之所。魯殿丞《郊餞詩》云『錦步斜開四十里』，即此地也。

趙園 南田依山爲園，趙衛公之所憇也。

杜園 自州城北，沿江而下七八里，有杜園。荔支品格與他園爭勝，又有母氏園，距州城上流三十里，荔枝聯亘，品格最多。

曹亭 自關市門順流而下三里許，有山曰峰門，其上即曹亭也。南望城郭，盡在目前。後有二石洞，東接落魄菴，下乃餘甘渡。

景物下

三華山

自朝天門下一里許，遠山聯絡，朝郡治之後，不知其所以名。

四香亭

在州治，舊在止水亭後。淳熙〔時〕〔九〕趙公所建，自題云：『永嘉何希深之言曰「茶蘼香春，

芙蓉香夏，本犀香秋，梅香冬」，斯〔名〕以〔以名〕〔一〇〕之。』李公後徙于花竹叢茂處，愈得其所。

恩威堂

在州設廳後。

壯猷堂

在州治。

籌〔邊〕〔邊〕〔二〕堂

在州治常衙廳之後。

雅歌堂

在州治。又有浮香亭、擁翠樓。

袞繡堂

在州治，舊名思政。淳熙八年，以趙衛公出鎮于此，改今名。

擁翠樓

在州治。

鎮遠樓

在袞繡〔堂〕〔二〕之對，當郡治之中，即整暇堂舊趾，四山環合，氣象甚偉。

整暇堂

在袞繡堂之對。舊趾既建鎮遠樓，乃徙此堂於郡之東偏，前拓中庭，雜植花木，爲郡圃之勝。

得要亭

梁公介所創也，在寶山。

偶住亭

在江安縣之對。建中〔靖國〕〔二〕初，山谷自樊道還過邑，宰石諒同遊此亭，書『琴操』，後改

爲渡瀘亭，有范百祿《平蠻碑》。見石行正《亭記》。

聽更堂 在安夷門外傅氏園之後，乃觀堂劉先生讀書處。

瀘江亭 在江皋，賓餞之地也。

凌虛亭 在龍馬潭之後，檻臨江流。

吟風堂 在倅廳。

清穆堂 即尹吉甫祠堂，取『穆如清風』之義。

歸雁亭 在郡之西山，王公大過建而名之。

瑞鹿亭 在光孝觀之後。初，道士尹希巖開山，有白鹿往來，因以瑞鹿名。

東嶽廟 在興化門外寶山峰之趾。往者昌州永川有陳祈者，以贖田事受欺於毛氏，陳訴于廟，事遂

白。有《碑》記其事，而《夷堅》^{〔一四〕}《所記甚詳》。

西山堂 在寶山三泉之上。李真有《記》。

北定堂 在北岩，帥楊汝明建。

南定樓 在州治。晁公建，取諸葛《出師表》中語爲名。李巽岩有《南定樓賦》，陸游《南定樓詩》：

『行遍梁州到益州，今年又作渡瀘遊。江山重複爭供眼，風雨縱橫亂入樓。』

南壽山 在樂共城西南三十五里，名博望寨，山高且秀，（晏）^{〔一五〕}蠻夷平定，守臣繪圖以進，上意

悅之，賜名『南壽』，又名『御愛』，其林木有禁不採。

安樂山 《元和郡縣志》云：在合江縣東八十三里。《圖經》云：在合江西五里，三峰清秀，山趾即安

樂溪上有延真觀，徑五里有石櫃，爲仙人藏經之所。岐而左，有爛柯跡石碁局，金線泉後有仙魚影，隱隱石壁中。岐而右，歷楠木臺、仙人室、十二盤，至剪刀峽，循山有八洞，通南岩，有石曰『許由瓢』。又有芙蓉城、滴水崖、白猿洞，此三峰中景也。《寰宇記》云：『有瀑布千尺飛流。天寶六年，改爲合江山。』《皇朝郡縣志》云：『始，劉真人珍卜居此山，曰：「（焚）〔棘〕」^{〔一六〕}道平，蓋氣歇而不清；江安方山，氣濁而不秀；成山而又清秀，惟安樂山耳。』遂定居焉。』水源發甘，虎豹服役。見黃庭堅《題行》。

安樂溪

鄧綰令此邑時，其《詩引》云：『安樂溪自合江縣西南山來，源入于江，源遠莫測其所從，其深廣可容大舟，其平如鋪，其色紺碧如玉，其勢回環宛轉，若有所避，不忍遽棄山而匯於江也。溪上多壽木，溪人莫得其名，藤蘿柏竹，禽鳥花卉，四時無不可樂者，故名之曰「安樂」。』

冲虚觀

在龍馬潭。上有龍馬祠，在三清殿之右，乃落魄仙招易元子之處。

延真觀

在合江縣西五里。隋賜三觀。皇朝嘉祐中，賜曰延真觀。安樂溪在觀之右，觀後距安樂山頂僅十里，檜竹四圍，歲有雙鶴來巢，逮夏五月，條欵啖空，引雛而去，至秋復來。

思峨洞

距州二百里，隸樂共城。初入稍隘，已乃漸闊，石髓凝結，千態萬狀。前行數丈，豁然宛若堂室，周匝可五七丈。又數十步，深明高廣，可容數百客。俗傳遊人飲于此，肴核狼籍，經夕眎之無見焉，竟不可詰。

滴乳泉

在西城真如寺。崖石中流出，泉味甚甘。山谷元符間渡瀘，徜徉此寺，喜其巖幽泉美，大書爲『滴乳泉』。

鏡子山

在江安縣南五里，又名照山。一峰中峙，兩峰旁翼，二溪交流，大溪出中峰之脅，小溪出中峰

之腹，葱蒨秀鬱，菴廬梵室，金碧交晃。旁有二潭，曰馬影，曰靈施，爲龍所居，早禱輒應。山有眠雲石、襲淵橋、玳瑁巖、磨鎌溪，清秀爲一邑勝遊之地。

銅鼓山

在少遠寨側。

酒甕灘

凡舟自大江而下者，至此無所忌。唯夏漲由納溪渡至石側，乃爲白崖所衝，舟人畏之。及水低岸遠，則巨石特立，圓腹陜底，危然一甕焉。

瀘峰山

《郡國志》云：瀘津關有瀘峰，高三十丈，地多瘴，三四月渡之必死，唯五月上旬，渡之即無害。故諸葛亮以五月渡瀘，相傳以爲即今之寶山。而李臺《西山堂記》云：『以常璩《華陽國志》及辛怡顯《雲南錄》考之，乃在越雋之地明甚，非瀘之寶山也。』

餘甘渡

餘甘碧實圓脆，峰門渡口倚岸成林。魯國先生題瀘川縣樓，所謂『餘甘渡頭客艇』是也。

天符葉

初生安樂山，一夕大風雨拔去，不知所在。後得於容子山，俗以爲神所遷，如荔枝葉而長，上有文如蟲蝕，或密或疏，宛類符篆，不知何木也。或以爲劉真人仙跡。東坡詩云：『天師化去知何日，玉印相傳世共珍。故國子孫今尚在，滿山秋葉豈能神。』穎濱詩云：『真人已不死，外慕墮空虛。猶餘好名士，滿葉寫天書。』

龍雲山

在江安縣北六十里。

龍馬潭

在城東北二十里。唐王昌遇落魄仙於此，以『龍馬一夕，送歸潼川』，因號曰龍馬潭。

小龜山

距江安縣百里，嘗即其地置樂共城。方興築時，因取石有小龜金紋，俗因呼爲小龜山。自其距登（三）〔至〕〔七〕絕頂，又有二山，名大連天、小連天。

巖』。

木龍巖

在城南寶山之趾。古有榕木，盤結夭矯如龍。舊有庵，山谷先生嘗徜徉其間，始榜爲『木龍

龍蟠灘

自州東去五十里，水交湊亂石之下者，曰龍蟠灘，舟人戒焉。

黃龍堆

在瀘川縣，即尹吉甫子伯奇投江之處。

紫金堆

在州津北，過內江口大江之中。耆舊云水落髣髴見之，或謂不常出，出則歲豐。

赤溪水

從昌州昌元縣界流入，至赤水鎮，合支江。

納溪水

源出阿永蕃部，至江門寨，有橫石中流，束水如門，故謂之江門，東入納溪寨，以合於大江。

中江水

《元和郡縣志》云：亦曰綿水，經瀘川縣北三里。出犍金。

大善寺

在州城，女僧所居也。舊有殿，因女僧重造高閣，（徹）〔撤〕舊殿題梁，乃隋開皇間建。

按州以隋初自馬湖江口徙此，則州治改卜之時，即有此殿矣。因其改作，遂廢古跡，亦可惜也。

大連天

小連天 在江安縣百里外，樂共城之側。

丁公山

在安樂溪之左，高踰千仞。舟行數百里，隱隱煙雲間，上有蕭齊碑，磨滅難考。

觀音巖

在東郭外二里。詳見《崇德廟記》。

古佛巖

出城北四十里，其溪山邃清，松竹深秀，榕木數十株，大皆十圍。巖廣十餘丈，兩翼皆飛泉如

谷簾，依巖有小寺。

龍女洞

東去城二十五里，溪源峻深，高崖峭壁，近百餘丈。崖半二穴，遠望幽邃，人不能到，俗傳爲

龍女洞。淳熙中，李巽巖來遊，觀瀑布有留題。

古跡

廢涇南縣

《寰宇記》云：『唐貞觀八年，分瀘川縣置，在涇水之南，今廢，入瀘川縣。』

廢綿水縣

《寰宇記》云：『在漢江陽縣地，晉置綿水縣，在綿水溪口、汶江水中洲上。』皇朝乾德元年，併入江安縣。

〔史〕〔使〕〔一九〕君巖

在城南五里。有巖洞深六丈有奇，廣半之。巖中有泉清冽。《圖經》云：『陸

〔史〕〔使〕君名弼，梁天監中，爲瀘州刺史，死有神異，葬白崖。此巖爲神遊宴之所，號『使君巖』。』象之謹按：《夷堅志》載：『本朝有英州刺史王獻可，乃王雲之父，知瀘州後，亦爲白巖神。今〔史〕〔使〕君巖若爲陸〔史〕〔使〕君遊宴之地，則當有唐人題刻。今其磨〔巖〕〔崖〕〔一九〕，止有國朝宣政間留題，則非陸〔史〕〔使〕君遊宴之地，乃王〔史〕〔使〕君遊宴之地耳。此不可以不辨。』

讀書巖

在州六十里江之對。有巖，下深十許丈，中有石如几案，乃先汪神童讀書處也，後人因以名。

李寅仲《詩序》：『洞不減三游，下有清溪，其上有水簾頗勝。』

煉丹井

在城中社壇山前。唐劉真人喜泉之勝，酌以煉丹，因得名號爲『靜應泉』，有碑碣在其傍。

江陽兒祠

《華陽國志》云：『漢光武微時，過江陽，生一子，望氣者言：『江陽有貴兒〔氣〕〔一九〕。』王莽求之，縣人殺之。後光武怒，爲子立祠，謫江陽人不使冠帶。』

梁王廟

在超勝坊。按《碑記》乃梁王彭越也。越在漢高祖時，雖云徙青衣，然未嘗至蜀，莫知其然